



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

CBI-i taoba railway minister Lalu Prasad dang ken o ashishi

Neymar tetsung surgery agitsü; season tepeyong masayatetsü



VOL. XX NO. 145 (ADOK 145) DIMAPUR RASEMNÜ (WEDNESDAY)

METSÜREMI (MARCH) 08, 2023

₹ 5.00

Rio-i kümsük punguben atema Chief Minister inyaker; TR Zeliang aser Y Patton na Dy CM shim

Kohima, March 7, 2023 (TYO): Mongulbarnü Neiphu Rio-i Nagaland nung kümsük punguben atongtepa Chief Minister inyaksü tezüngzüktep agiogo.

Tanü CM Rio den külemi Deputy Chief Minister ana aser council of minister 9-i tezüngzüktep agi. Nagaland nung tang mezüng atema tetsür minister kati tezüngzüktep agia liasü.

CM Rio ya Nagaland nung dang masü saka North East state tem nung mapang talangtiba chief minister inyaksang lir. Pai taoba Nagaland Chief Minister S C Jamir ajatetogo.

Rio-i 2003 nung mezüng Chief Minister inyak. Iba mapang NPF-BJP indang Democratic Alliance of Nagaland (DAN) sorkar liasü aser iba sülen 2008 o 2013 nung kümsük tasemben tashi chief minister inyaka aru.

May 2014 nung pai Chief Minister menden yutsür Lok Sabha nung MP inyaksü ao saka 2018 nung pa meyipa arur kümsük pezüben atema Chief Minister inyak. Idangji Nationalist Democratic Progressive Party



March 7, 2023 nü Capital Cultural Hall Kohima nung Prime Minister Narendra Modi aser Nagaland Governor La. Ganesan na den Council of Ministers külemi agiba noksa angur.

(NDPP)-BJP indang People's Democratic Alliance (PDA) sorkar liasü.

Rio-i küm 16 tema Chief Minister inyakogo aser tang kümsük punguben inyaksü.

Mongulbarnü Capital Cultural Hall Kohima nung Nagaland Governor La. Ganesan-i tezüngzüktep agidaksü aser tang mezüng atema Prime Minister Narendra Modi, Union Home Minister Amit Shah aser BJP President J P Nadda nung iba sentong nung aden.

Iba sentong nungsa Assam Chief Minister & Northeast Democratic Alliance (NEDA) Convenor Himanta Biswa Sarma aser Union Minister of State for Social Justice and Empowerment and RPI (A) national president Ramdas Athawale naprong aden.

Maneni, Nagaland nung tang mezüng atema Deputy Chief Minister anati tezüngzüktep agiogo. Tenaji taoba Chief Minister & NDPP MLA T R Zeliang aser BJP MLA Yanhungo Patton na lir.

Nagaland nung mezüngbuba tetsür cabinet minister Salhoutuonuo Kruse-ia tanü tezüngzüktep agia liasü.

Rio'er cabinet nung NDPP MLA 7 aser BJP MLA 5 lir.

Nagaland council of ministers nung NDPP nungi G. Kaito Aye, K. G. Kenye, Metsubo Jamir aser C L John nung lir. Külen, BJP minister temji N. Jacob Zhimomi, P. Paiwang Konyak, Temjen Imna Along aser P. Bashangmonba Chang nung lir. K. G. Kenye, P.

Bashangmonba Chang aser P. Bashangmonba Chang nung dak alaka tanüngba minister tem dang taoba mapang Rio'er cabinet nung dena arurtem dang lir.


"Nagaland nung tanüngba political party tem- NCP, NPP, Naga People's Front, RPI (A), LJP(Ram Vilas), JDU aser Independent MLA temia opposition maliba sorkar akümsü atema yariteptsü shiogo anungji NDPP aser BJP tsüngda iba atema senden ka agia lemtetsü" ta CM Rio-i osangbener dang ashi.

"Cabinet minister tem indang portfolios aser tanga MLA tem Advisor ama shimokba maparen anogo ana-ase ka tsüngda inyaksü" ta paisa metetdaksü.

Iba sentong nung Music Academy, Kohima (TAFMA) aser Police Band ajanga linük naklu ken aten aser Kohima Ao Baptist Arogo pastor Temjenmongba Sempo-i temoatsü meshia sarasadem.

Sentong nungsa Cantamus Choir (TAFMA) ajanga 'Hallelujah Chorus' aser Bright Lights (TAFMA) ajanga 'This is me' kentem aten.

NSF-i PM Modi dang Naga yimten latetsü nenshir



March 7, 2023 nü Kohima yimdong nung NSF züngsemtemi PM Narendra Modi dang sayuba banner ka angur.

Kohima, March 7, 2023 (TYO): Naga Students' Federation (NSF)-i Prime Minister Narendra Modi pelashishia agizükdang Naga yimjung olemtep tembangtsü nangzükba inyaksü nenshia metetdaksüogo.

Prime Minister Modi den Union Home Minister Amit Shah, BJP national president J P Nadda aser Assam Chief Minister Himanta Biswa Sarma nung Kohima-i NDPP-BJP-2 sorkar tezüngzüktep agiba sentong nung adentsü atema aru.

NDPP aser BJP züngsemtemi yimdong nung Modi pelashishia agizüktsü atatepdang NSF-i banners aser placards amer noktak.

NSF züngsemtemi "Dear Prime Minister of India Narendra Modi... Honour the Indo-Naga Framework Agreement of 2015", "Nagas want inclusive,

honourable and acceptable solution", "Modiji Keep your word", "Stop India's duplicity - immediately remove India's occupational forces" amala tezülubatem amer yimdong nung noktak.

"Centre sorkar dang Indo-Naga Political tebilemstü tekaratiba nung tembangtsü takhangba agüja onoki timi sayuogo" ta NSF general secretary Siipuni Ng Philo-i ashi.

Nagaland nung alirtemi shimtetba MLA temia Naga yimten tebilemstü ya politics nung onük ka dang masü saka Naga nung taginübatem temulung nung yur yariteptsü nenshia metetdaksür, ta NSF-i ashi.

Naga lanurtemi Naga nung lima nung yimjung aginür aser asenok tsüngda telemsa adokba ya magizüker, ta NSF-isa ashi.

Conraden minister 11-i tezüngzüktep agi; BJP MLA 2 melentepa inyaksü

Shillong, March 7, 2023 (Agencies): NPP president Conrad Sangma-i Mongulbarnü kümsük tanabuba atema Meghalaya chief minister inyaksü tezüngzüktep agiogo.

Conrad den külemi Council of ministers nung züngsem 11-i tezüngzüktep agia liasü.

Meghalaya nung NPP nungi Prestone Tynsong aser Sniawbhalang Dhar nati deputy chief minister inyaksü.

Tanü BJP nungi Alexander Laloo Hek, UDP nungi Paul Lyngdoh o Kyrmen Shylla aser HSPDP nungi Shakliar Warjri nungeri tezüngzüktep agi.

Meghalaya cabinet nung

National People's Party (NPP) nungi MLA 7, UDP nungi 2 aser BJP o HSPDP nungi kaka lir.

Mongulbarnü Raj Bhavan nung Governor Phagu Chauhan-i parnok nem tezüngzüktep agidaksü aser iba sentong nung Prime Minister Narendra Modi, Home Minister Amit aser BJP president J P Nadda nung aden.

Meghalaya assembly election magidang BJP-i Conrad Sangma'er sorkar ya ochimeshitiba sorkar ta tai tonglokja liasü saka election agiba sülen BJP-i mezüng Meghalaya sorkar nung yariteptsü telemtetba agi.

NPP nungi cabinet minister

temji- Marcuise N Marak, Rakkam A Sangma, Ampareen Lyngdoh, Comingone Ymbon aser A T Mondal nung lir.

Meghalaya nung NPP-i aniba sorkar nung MLA 45 lir.

Deputy CM ana shimba atema osangbenertemi asüngdangdang "iba ajanga Meghalaya nung tesem balala aniokba sayur. Iba ajanga nisung ajak adener ta asüba osang tajung sangoktsür" ta Chief Minister Conrad-i langzü.

Ghonda 24 nungi 48 tsüngda cabinet minister tem indang portfolios metetdaksütsü ta paisa ashi.

(Maneni tapak 2 nung...)

Imkongjiba Kichu tepsetba dak sendakba nung nisung 9 pua lir

Mokokchung, March 7, 2023 (TYO): February ita nungto memetetba nisung kari Satier aser New Camp na tsüngda Chungtia nung Imkongjiba Kichu tepsetba dak sentakba nung Mokokchung police-i nisung 9 (nine) pua lir.

February 21 nü Satier o New Camp na tsüngda Chungtia nung Imkongjiba Kichu dak memetetba nisung kari amaktsü merangba den, pa samaba keno indang FIR ka agütsü. Iba osang angashir, Police-i iba tesem jagi or bushidang saka nisungbaji mengutet, ta Mokokchung Addl. SP & PRO-i sangdong ka ajanga

metetdaksü.

Tasüng Feb 22 nü Satier o New Camp na tsüngda arem min tezü ka nung Imkongjibaji tasümgang dang ngutet. Aji sür, police-i keno bushisüngdangtsü asoshi Mokokchung SDPO tekolak sür Special Investigation Team (SIT) ka tenteta liasü.

SIT teloki iba keno bushidangyonga aoba mapang, kuli tapu balala ngutet aser ibaji tatongi bushidang nisung 30 dak tali jaoka asüngdangya mapaji inyaka liasü, ta Addl. SP & PRO-isa ashi.

Kuli balala agitepa medemdang külen item nisung

9 ya pua kar; Chubanichet (31), Meyalepden (49), Chepdakmayang (28), Tongpangsuba (40), Lipoktmesu (28), Imtizachet (27), Supongsunep (35), Temsuakum (32), Bendangsunep (29), parnok ajak ya Chungtia nung dang lir, ta Mokokchung police-i metetdaksü.

SIT-isa lendong atalokba tesem nungi temulung melemteti bilemba oset azü keter aliba süngshi ka (feet 3 shi asütsü) nguteta lir. Iba keno ya ano maneni tarokba nung bushisüngdangdar, ta Mokokchung Addl. SP & PRO-isa ashi.



Kohima nung Nagaland sorkar tasenba tenangzüktep agiba sentong nung dener India Ato Kilonser Narendra Modi ya Dimapur Airport bushia MI-17 helicopter nung March 7, 2023 nikongdang 3:15 ako nung alu aser IAF BBJ tayimtsü nung mener nikongdang 3:20 ako nung Guwahati bushia ao.

NHAK nung Jan Aushadhi Diwas amung

Dimapur, Metsüremi/March 07 (TYO): Linük ajunga den külemi NHAK Auditorium, Kohima nunga March 7, 2023 nü Jan Aushadhi Diwas munga liasü.

Iba sentong nung Commissioner & Secretary of Health and Family Welfare Nagaland Y. Kikheto Sema IAS ajanga ashiba agi, Ato Kilonseri tenzükba Jan Aushadhi Diwas ya 2019 nungi tenzükba küm shia March 7 nung amunger aser iba mapang genetic medicine temaba jenjangi ajungkettsür aser iba scheme indang awareness agütsür.

Iba scheme yagi nüburtem takum nung kongshiba ajiteter, koba ajanga jenjang tajemba nung teyari agütsür, ta pai ashi.

Küm ishika tsüngta Jan Aushadhi store ya 90,000 dak tema kumogo aser linük nung district ajunga nung amai lapoka

lir, ta ashi.

Iba scheme kübok mozü 1700 dak tema aser surgical 280 kumogo aser item mozü ya shilem 50 shi agi tajemba aser mozü karbo brand aliba mozü dang shilem 80-90 agi tajemba lir, ta pai ashi.

Linük tesem aika nung iba scheme ya kanga nüntugu lir, saka asen state nungbo Dimapur nunga warehouse balaka mali aser asenoki danga state nungia meshitsüsa akumer, ta Sema-i sasaba lemsatep.

District aika nung courier service peria maliba agi iba teyari ya magiteter, ta ashi.

Pai sentepa alirtem dang Jan Aushadhi mozü ya majungba agi jenjang alanger masü saka makamaiter ajangzüksü asoshi lir, kechiaser item ya National Accreditation Board for Testing and Calibration Laboratories (NABL) nung tendanga yanglu

ta nüburtem nem angazükdaksütsü ajungshia liasü.

Nodal Officer Sr. Specialist Dr. Lozino Peseyie NHAK ajanga 'Jan Aushadhi Experience of lesser privileged patients' onük nung PowerPoint agüja lai Pradhan Mantri Bhartiya Janaushadhi Pariyojana (PMBJP) indang mission nükjidong rateta ashi aser Jan Aushadhi product indang yimyatem lemsatapa liasü.

Lai generic mozü indang jembia aser kechiba generic mozü jenjang talangba ta asüba indang jembia liasü.

Iba sentong nung menden Dr. Vibeitunuo M. Sachu, Principal Director H&FW liasü, Mokochung District-i best performing Kendras sempet angu aser Managing Director NHAK Dr. Sendimeren Aonoki melezüng o jembia liasü.

PHED Kohima Urban Division-i aitsür

Dimapur, Metsüremi/March 07 (TYO): Mejangjaba nisung kar ozüing alema Kohima Science College, Jotsoma nung tenodangba agüja aliba treatment plant telungi temelaba makai March 5, 2023 nü aita PHED nung inyaker

merenshiba atema khukhua aitsür, ta office of the Executive Engineer, PHED Kohima Urban Division sangdong ka ajanga ashi.

Iba treatment plant compound yagi temelaba malirtem arutsü memelar aser memelaba tesemi tashiyim agi

aita temolung agüja nübur tenzükba mapang mapa inyaker temang yirutsüba ya kecha lokti nunga temeden mali, ta sangdong ajanga ashi.

Iba TREATMENT PLANT yagi Kohima Town nung tajemtsü tzü agütsür aser PHED ajanga amshir.

Excise temi sen crore 2.30 jenjang yi/mozü raksa indokogo



Dimapur, Metsüremi/March 07 (TYO): Sen crore 2.30 jenjang yi/temesepba mozü pua alibatem NLTP Act 1989/NDPS Act 1985 indang Section 73 kübok Excise Directorate Complex, Dimapur nung March 7, 2023 nü Liquor/Drugs Destruction Boards ajanga raksa indokogo.

Raksa indokba osettem ya Dimapur nung aliba enforcement wing asem - District Excise, Mobile Squad aser Narcotic Cell ajanga

December 2022 aser February 2023 tsüngta apuba alitsü.

Raksa indokba yi/mozü yamai alitsü:

a. IMFL - 58,647 assorted bottles,

b. Beer - 22143 assorted bottles/cans,

c. Wine/Vodka/Breezer - 1447 assorted bottles.

d. Codeine based cough syrup - 459 bottles (AFD COUGH brand)

Kasa mapang case compounding nungi bendenba

sen lakh trok agütsüogo.

Item yi/mozü raksa indokba sentong nung Commissioner of Excise, H. Atokhe Aye (NCS) ajanga Excise Enforcement personnel temi ita ishika tsüngta aser talisa benjong aser State General Election 2023 mapang item oset apuba asoshi tenüngsang agüja liasü.

Nübu peria meliaka aser tensa jangratemsü meliaka pei mapa jeret-pereta inyakba atema pelar aser maneni temolung agüja inyaksü ajungshir, ta pai ashi.

Governor Ganesan-i Holi benjong salem lemsatep

Dimapur, Metsüremi/March 07 (TYO): Nagaland Governor La. Ganesan-i sangdong ka ajanga, Nagaland nung aliba nüburtem dangi Holi benjong salem abener, ta ashi.

Holi ya nüburtem tesendaktep tajung nung aliba benjong ka lir, koba agi tepela aser teimla bener arutsür. Sentsü tabo jenti amshia iba benjong amungba ajanga temenen

madak tajung agi takok angur. Asenok ajaki Holi benjong tamendakba angatetti, koba nüburtem ka kuma lungjemtsü aser kati ka akumtsüboa meimtsü asoshi lir, ta pai ashi.

Iba benjong tulu nung ni nübur ajunga dangi tebour tajung aser tepela benjong salem abener. Tsüngremi Nagaland moajang, ta Governor La. Ganesan-i ashi.



Nagaland nung sorkar tasenba tenangzüktep agiba sentong nung adentsü atema Union Minister of State for Social Justice & Empowerment, Ramdas Athewele ya March 7, 2023 nü Indigo tayimtsü nung Dimapur Airport tonga aru aser Kohima bushia gari nung atu.

KLC aser NVCO pur International Women's Day amung

Dimapur, Metsüremi/March 07 (TYO): Küm shia March 15 nung amungba World Consumer Rights Day nung shilem ka ama Nagaland Voluntary Consumers' Organisation (NVCO) aser Kohima Law College (KLC) lungjemer March 7, 2023 nü

International Women's Day munga liasü. Iba anogomung ya alima ajunga nung 2023 küm omen "DigitALL - Innovation and Technology for Gender equality" nung ajemdaker munga liasü.

Iba sentong nung NVCO tir aser KLC nung associate professor, Kezhokhoto Savi-i ashiba agi, International Women's Day ya March 8 nü lir aser iba anogomung nung tetsürtemi takok anguba benjonger aser takumbo Nagaland state asoshi khenyongi balaka lir, kechiaser February 27, 2023 nü state assembly election agiba nung 8 Western Angami nungi Salhoutuonou Kruse aser 3 Dimapur III nungi Hekani Jakhalu nati NDPP ticket nungi toktepa nung takok ngua Nagaland Legislative Assembly nung otsü tasen ka züluogo, kechiaser taoba mapanga

tetsürtemi state assembly election nung toktepa takok angurbo tena mezüngbuba alitsü.

Iba ya ajanga tetsürtemi '33% women reservation' agi maleni temaba jenjang tongtetsü ta ajiteter aser alima dang sayur, ta pai ashi.

Tetsür-tebur tsüngta telemsa adoka aliba anema tanen makai raraba asoshi iba anogomung yagi awareness agütsür, ta pai ashi.

Iba anogo nung asenoki tetsür temeden atema temelenshi bener arutsü mapa inyaksüla aser tetsürtemi takok angubateme meyipa repranga parnok tali ajungmesotsüla, ta pai ashi.

Alima nung tetsürtemi shilem agiba ya ajaki agizüksüla aser akumtsüboa amshitsüla. COVID-19 anema raraba nunga tetsürtemi yakpang sür liasü, kong parnok health sector workers, scientists, doctors aser caregivers ama inyak, ta pai ashi.

Tetsürtemi len aniba nung asenoki takok tajung angur aser item rongnung tatishitsü tajungtibaji COVID-19 pandemic ya lir, kechiaser iba tongpang ya tetsürtemi anir rara, ta Savi-i ashi.

Conrad den minister 11-i ... (TAPAK 1 NUNGI...)

Meghalaya nung menden ana nung dang takok anguba sülen Bharatiya Janata Party (BJP) high command-i BJP MLA ana küm ana ser tesadang inyaksü telemtetba agiogo.

Pynthorumkhrah MLA AL Hek aser South Shillong MLA Sanbor Shillai nati küm ana ser tesadang lemsar cabinet minister

inyaksü.

Mezüngbuba shilem nung Hek-i August 7, 2025 tashi inyaksü aser iba sülen Shillai-i kümsük tanüngba inyaksü. MLA anaprongi party telemtetba akhümtsübütsü aser tashi angatsü metetdaksür ta BJP state president Ernest Mawrie-i shidi ka nung ashi.



Kanga pelar

14 Buba Nagaland Legislative Assembly election nung tokteptsü asoshi 22 Arkakong sanger talisa party worker-tem, ana aser talang nungi medemertem, kinungertem, meteta aser memeteti shirnokisa ni nongita yariogo, nenok ajak dang kanga pelar. Tang asenok tamakoker ka süaka ibai tatem masü. Asenoki lungjemer Arkakong sanger aser Naga lima renloktsü asoshi maneni meranga inyaktsü.

22 Arkakong AC menden asoshi kü den tokteper takok angusang Shri. Nuklutoshi, NPP nem takok anguba asoshi tenüngsang agütsür.

Election nung tokteptsübaji mapa temela masü. Aji oda, kü dak tamang kaa, nübu, rongsen aser shisatsü agi nongita yariba ajanga asenok iba tashi arutetogo. Asenok tamakok nguaka Shri. Neiphiu Rioi aniba Government alliance nung bener arutetogo. Anungji asenoka iba maongka nung asen constituency asoshi terenlok mapa inyaka otettsüji asendak tashi lir.

NDPP Central, NDPP region office Mokochung aser NDPP 22 Arkakong AC nung mendenpur nungi party worker ajak dang kü dak tamang kaa yaritepa aruba asoshi kangasa pelar.

Asenok maneni iba telungjem nung aotsü ni aser ozü kibongi mepishir aser nenok taküm aser wadang Tsüngremi maneni moajangma.

Nenok den teti

IMNATIBA

CBI-i taoba railway minister Lalu Prasad dang ken o ashishi



New Delhi nung Lalu Prasad Yadav'er kima osangbenertem adenshia aliba noksa ka angur.

New Delhi, Metsürmei/ March 7 (Agencies): Central Bureau of Investigation (CBI)-i, ali melena mapa agütsütsü nangzükba (land-for-jobs scam) ochi mashi ken o nung taoba railway minister Lalu Prasad Yadav dang Mongolbarnü ken o ashishi tenzükogo. Pa kinungtsü Rabri Devi dang ken o ashishiba sülen anogo ka lir pa dang ken o ashishi tenzükogo.

Taoba Bihar chief minister dang ya CBI-i Patna nung lar kidang ghonda pongu shi ken o ashishia liasü.

2004 aser 2009 tsüngda ali sempet ama agütsüba mesüra dalang agi minister'er kinungertem dang ayokba melena railway nung nüburtem nem mapa agüja liasü ta aija lir, ta ketdangsurtemi ashi.

Ketdangsurtemi ashiba agi,

CBI ketdangsur pongu Mongolbarnü 10.40 ako nung Pandara Park, Delhi nung lar jala Rajya Sabha MP Misha Bharti'er kidangi ao. Yadav tezüng transplant asüba sülen par jalaer kidang mungzuka lir.

Source ajanga ashiba agi, pa temang kanga mejungi lir aser o jembitetsüsa jenjang ka nung mali aser Lalu Yadav'er kinungertemi ken o bushisüngdangba mapang teka amteper inyaktsü ta shiogo.

CBI-i, criminal conspiracy aser Prevention of Corruption Act provision balala kübok Yadav, Rabri Devi aser lar jala densema nisung 14 anema ken o benokogo. Aija alirtem ya Delhi, Rouse Avenue District Courts-i March 15 nü jaokogo, ta parokisa ashi.

CBI-i January ita okadak prosecution sanction letter

benokogo.

CBI-i ashiba agi, tang ken o ashishiba ya senotsü intokba jangjatsü aser iba dak tanga ken o sendaka aliba bushisüngdangtsü atema lir.

Kasa mapang nung yadav aser pa kinungtsü dang ken o ashishiba ya opposition party temi aitsüogo.

Par jabaso aser Bihar deputy chief minister Tejashwi Yadav-i, par kinungertemi tanen makai Bharatiya Janata Party (BJP) anema nokdakba ajanga CBI-i iba jenjang agir, ta ashi.

Tejashwi Yadav-i, langka ajangzükker mapa agütsütsü asoshi taoba railway minister Lalu Prasad dak kecha tashi maliasü, ta ashi.

Congress aser AAP-ia, opposition ola remseptsütsü merangba atema centre sorkar aitsüogo.

Indian Coast Guard, Gujarat ATS-i sen crore 425 alang heroin apu



New Delhi, Metsüremi/ March 7 (Agencies): Indian Coast Guard aser Gujarat anti-terrorism squad na longjemer meita aoba mapang Hombarnü Iran nung indang rong ka nung sen crore 425 alang heroin seret 61 bener lia puogo, ta coast guard-i Mongolbarnü sangdong ka ajanga metetdaksü.

ATS-i osang tejangja ka agütsüba sülen meita aoba mapang coast guard-i iba rongnung nung mena alir nisung pongu puogo.

Iba meita aoba sentong ya Okha tzüküm nung benoka inyakshangshia liasü. Iran nung indang rong yagi coast guard paitoka aotsü merandang saka tamakok angu, ta ketdangsurtemi ashi.

ATS-i osang tejangja agütsüba dak ajemdaker coast guard-i ashiba agi, parnoki ICGS Meera Behn aser ICGS Abheek ta patrol boat takara ana Arabian tzüym meita atatsü atema yoka liasü.

"Mangsema akümba

mapang Okha tzüküm nungi km 340 shi pilar temulung melemi bilemba rong ka India tazükba kübok aliba tzüym nung senzüa aliba angu. ICG rongi ken o ashishiba sülen iba rong ya jena ao. Iba sülen rong ya arishia ao aser ICG rong temi anendakja liasü," ta kasa sangdong ajanga metetdaksü.

Taoba ita 18 tsüngda coast guard-i ATS den longjemer bendanger rong ti puogo aser item rongtem nungi sen crore 2,355 alang temeseba mozü seret 407 puogo, ta parokisa ashi.

"Coast guard boarding team-i ken o ashishiba mapang rong nung mena alirtemi temulung malemtsüsa inyakshangshia tenzük. Rong kanga junga bushisüngdangba sülen sen crore 425 alang temeseba mozü seret 61 bener aliba nguteta liasü. Rong aser iba rong nung mena alirtem ajak puogo aser ken o maneni bushisüngdangtsü atema Okha-i anir aruogo," ta ketdangsurtemisa metetdaksü.

DMK-i OplIndia CEO, editor anema ken o benok

Chennai, Metsüremi/March 7 (Agencies): Tanga state nungi aayangi arurtem amakba dak sendakba nung teyazü osang prokshiba atema Tamil Nadu police-i web portal OplIndia indang chief executive officer aser editor anema ken o benokogo.

Avadi city police commissionerate sangdong ka ajanga ashiba agi, Dravida Munnetra Kazhagam's (DMK) IT cell divisional secretary Suryaprakash tashishiba ka benokba sülen ken o ya portal indang CEO Rahul Roushan, editor Nupur Sharma aser tanga staff tem anema benokogo. Suryaprakash-i ashiba agi, parnok indang Twitter post ajanga aayangertem mesüngjemteti kümdaktsüogo.

Tamil Nadu police-i taoba mapang Tamil Nadu BJP tir K Annamalai, BJP, Bihar unit @BJP4Bihar Twitter handle, BJP otongdar Prashant Umrao aser Dainik Bhaskar osang kaket yimo zülur Mohammed Tanveer nung anema ken o benokogo.

Bihar nungi aayangertem amakba dak sendakba nung social media nung osang tai prokshiba nokdangtsü atema Bihar aser Tamil Nadu sorkar na longjemer inyaka aliba mapang ka nung tang iba ken o benokogo.

Bihar nungi ketdangsur telok

ka Honibarnü Tamil Nadu-i oa aayangertem rongnungi lenirtem, labour contractor aser NGO tem den sensaksemogo. Tamil Nadu nung tanga state nungi aayangertem amakba indang taittsüba adokba jangjashitsü atema parnoki iba state semdanga liasü.

"Tamil Nadu sorkar aser district administration-i aayangertem kümzüka toktsütsü aser parnok tetsübu nung metoktsütsü atema jenjang agiba ngua onok temulung süogo," ta Bihar rural development secretary Balamurugan-i Hombarnü ashi.

Bihar nung Tamil Nadu nungi Holi amungi arurtem indang noksa ya parnok jenshiba ama prokshia liasü. Anogo ishika tsüngda aayangertem dak azükba video social media nung prokshia liasü, ajisüaka item video tem ya teyazü aser tanga state nungi ta jangjaogo.

Tamil Nadu DGP Sylendra Babu-i taoba mapang, social media nung nisung dak azükba video prokshia aoba ya state nung atalokba masü ta ashiba den item olulu osang prokshirtem anema jenjang tapet agitsü ta tekümdangtsü metetdaksüogo.

State-isa, district tem nung aayangertem atema special helplines tem laoktsüogo.



TIR YIMYIM YIMOBILEM (EDITORIAL)

DIMAPUR RASEMNÜ, METSÜREMI (MARCH) 08, 2022

Joko kishi shibangogo

Election-a temogo aser government-a kumtetogo, anungji election nung adokertem mapa tenzuka aotsü atema mezungbuba teinyaktsüji kidangi public shinga marudaktsüsü asoshi kishi (gate) shibangtsü. Nagaland nung government tasen kümli kanga karaa aruba temelenshiji aji asütsü. Aji oda, tang nungibo yimtak yimtsungtem nung sentong tulu yanglur tongti tesemdang asütsüka mejaokra, taruba election mapang matong tashi mangushitsü. Iba amai nübortemi shimtetba yimsüsürtemi inyakba angu dang kanga jashir aser longkak aita anema apusoner. Ajisüaka, ibaji tapi agibo masü. Aji kodang jungjunga bilemdangdir, hau ta asütsüsa election mapang nübortem temeten senyong yokadokba osang aika angashir. Aji oda, yimsüsür shimtsü tashi aser temeten agütsü nung, aji kecha hau ta mali senyong yokadokba nisung shibaibo zungshitsü? Shibaibo senyong pei temeten aser pei vote yokadokba nübortem asoshi pelashishia kishi lapoker atatsü? Shibaibo pei temeten senyong ayokba yimkong nung arua pelatepa mongnütsü? Joko, tang nungibo election nung madokertem asoshibo kecha jembitsü mali saka tadokertema anogo shia election nung atsüba sentsü aotsü indang bilemstsü. Iba amaji tokolok nung election sentsü indang bilemdang, nübortem asoshi mapa tajung inyaktsüsü bilemer masü saka sentsü aotsü indangang bilema ano tanaben election mapang tongadoker. Iba amaisa küm pungu shia election agiyonga aonungbo, Naga nunger takar aika sensaker akümstsü aser sensaker ajak auer ashir akümstsü. Aji oda, yimten yimsüsütsü shisatsü aser tashitemetet aliba nisung masü saka sen akartem dang election-i itetba putu mapang ya menokdangteti odaktsü nungbo, asen lima tatar sendenji yimsüsür aser ozüng yanglur adenshidak masü saka ashir auer aser ozüng raksartem adenshidak sendenang ka asütsü. Atangji, tanga yamaji dang lir, kechiyong tatar yimsüsürtemi ozüng yanglur aser ozüng beshir masü saka parnokiang ozüng raksaba angur. Aji oda, election mapang nübortemi pei temeten yokadoker, election sülen parnok shilem ajak agizüka chitsüyonga ola madoktettsüsa aliba rogotemji shibanger metsüba ak den kecha tepila mali. Joko, taküm küm-a asen chirnurtem sen meindoki asen lima nung doctor aser engineer küma zungtettsüsa kaketrejju tajung lapoktsüba sen agi election mapang asenok vote alidaktsüogo ta bilemdi. Kasaji, asenok shirangdang jet ta taneptsü angutsüsa mozü ki tajung nung doctor aser nurse teperi den tashidak tendangba oset shitak alioka ayutsüba sen to agi election mapang asenok vote alidaktsüogo ta aseoki bilemdi. Aji oda, asen nungdak peria light aser tzu yoktsüba sen agi asenoki vote ayokba sen to menoktsü merangdang, asenok ayaterem nung tüzüda aotsü aser light maru teimba ser kecha meinyaktet amang nung tagidak maka kümadoktsü. Joko, election nung vote ayokba sen agi Dimapur nung osettsüset alitsü nübortem adenshiba agi, Dimapur nung melepa aolena mali kümogo. Aji oda, külen election shia election-i aier Naga nunger noklang ana shi sensaker kümdaktsür aser parnoki vote alidang endokba sen crore meyirijang kashi agi vote ayokertemi tüzmar dokan purtem takar kümdaktsür. Tanü Naga nunger ket ajanga amshiba rongsen jenjangji yamaji lir. Joko election temerji asenok aika ket nung smart mobile phone tasen akatsü saka taruba ita nungi mobile recharge asütsü sen mangutsü. Joko, asenok aikati gari amshir saka taruba ita nungi totzü meinoktettsü aser gari tetsünga memelentet ser longdaka ayutsüsa akümstsü. Joko, election candidate-bar kia shibangogo aser MLA-baer gate-a melapoktsür, anungji asenoka asen lui aotsüla. Joko, taruba election nungbo asenoka asen vote ayoktsüsa masü saka asen sen aser nübo agi asen candidate yaritsüsa tanü nungi mapa inyak tenzükdi. Asen sen, asen nübo aser asen vote agi nisung ka MLA kümdaktsür, pa mesüra la denji shisalematepa asen lima yangertsüba agi asenok ajak asoshi meraket mapa ka asütsü. Asenokbo asen vote senyong ayoktsüba ya taaktsü mapa ka kümdaktsüdi aser asen lima meraketa yangludi.

OLEMSABANG

CHO ELECTION TEMPANGOKO....

~ Atsung Imchen, Kohima, Nagaland

Shirnoksa kinunger, adianu, anükapang, metemer aser pei kiyonger den election atema raratep, nenok tesem dangalen tasen kati aotsüba asü? Pei kimong yoker danga tesemleni belenshitsuäba asü? Mesüra Candidate shiba asoshi tesendaktep ajak rakdangtsü/lepdoktsü renema liasü, pai nenok anir aotsüba asü? Kongisa aotsüba? Onoka anir oangma.

Nütsüng nüburtemi yamato tesungmangtsü Free and Fair election lidaktsüsü atema mepishir külena shir Yim Councils temi telung nung nübur temeten ajak rakzuka yur "Candidate" ka nem dang vote agütsüsü lemtet, nenok yimi aser bangdak alirtemi terenlok ajakji agitetsü ta amanger. State of the Art school, lemang tajung, hospital tajung, light, infrastructure tajung item ajak nenok meyong süangma. Talisa Christianity tashitait aliba Yim tem (nenok iba ocet azüngertemi koba yimsa ibala mapa nung shilem aki aji jung junga meteta lir).

Tazünger mapa malir lanurtem (Educated unemployed Youths) mesüra kar mapa inyaker lanurtem nenok longjemer molusungzü ama artepa senzü, long agi ontep, aser tangar candidate party den zükteptsüba asadena tongpang jazüka merenshia senzü, nenoki anüngdang tesangwa agi aonung tammang kümdaktsüsü renema liasü. Nenokia ya züngdar ta metet. Free and Fair election atema nenoki yamato akhanga nokdakba temolung agütsüba ngur shiba majeptsüba, shiba mepelatsüba? Candidate mapang tatsüka atema nenok anasa aliba, Pa/la bo joko oadokogo, joko nenoki pa/la majurutsü. Saka nenokbo tesüba mapang koma mapa mali liasü iba dangisa meyipa yama to dang mapa mali (unemployed) alitsüba südi? PUBG aser League of Legend mobile temsa saiya alitsu südi? Mesüra Youtube nung Mukbang Channel lapoktsüba?

Ano item lanu, tain, tantsür aser tamburtem, tetsür aser teburtem shirnoksa proxy vote nung shilem agioko, pei temeten vote atema sen agia yokdok, lokti jateper candidate dang telok atema sen meshi. Item to nenok business kar nung amshia (invest) yua lir ta amanger. Kechiyong joko nenoki kodang lenmang majung, Hospital majung, light majung, school majung, development mali ta complain sudir nenokji tejak ana, temeli ana adenba anemsü nisungchi masü ta tangari ajenloktsüsü, jaloktsüsü. Shibai kechi koma inyak, sen achi, sen amshi ajakibosa memetetsüa akok saka karibosa ngua lir. Anungji ne molung masüba lemsatepdang nai election nung shilem agia arubato tamadok. Anungji iba atema küm pungu tepeyongji complaint mesüli liang ta mepishir.

Pastor tem, Tsungrem tenzükertem shirisa kechi yim aser jila tem nung Free and Fair election NBCC, ABAMI ayongzükba aser mepishiba ama mangu aser meinyaktet, nenoki jembiangma, sayutsüngiangma. Joko sentep kidangi neburtem Tsungrem taochi aser temoatsü meshitsü maaki arutsüako idangji item temenen, tamakok, aser tashiyim mapatem telokdi nung jembiangma. Kecha masü ama ola madoki doktsü nungbo tenarong tajak ama aser anemsü asütsü. Item ajak ya ner arogo nung santem, shibai metet karbo pulpit nung nokdaker laishiba azüngertema asütsüako. Oh!!! Asenok Christianity arur küm 150 benjongmung monger ita asem shika dang. Iba temoatsü aika tang election nung ayipa oadokogo. Asen Tsungrem ya-a alimai alur election nung toktep nung sen maliba agi madoktsü nung koda. Asen Naga nungertemi iba tashi ang sen meima kümtet nuh. Asenok "Sen alar" kümogo.

Nüchiso bushirtem, Naga sepaitem election nung shilem magitsü tetuyuba liaka nenok kwinaka kanga nendaka inyaka prangpong tashi nung nuburtem molungba masü nenoki molungba dangi aniogo. Tangbo pelaa bilemer südi? Nenokia dena ochiba tangatetba aser tetuyuba nung mejajara kudasür nuburtemi nenok nungitsü yimlar? Indian sen aki alizuker prangpong tashi amer nübur temeten rakzuka, lokdi ajak tekolaki menüdaktsübaji kodaser nüjiso bushiba ta jatetsü? Nenok shidakba asen nüchiso temeden asoshi nokdaker süra tsüngchi sepai ka amai nokdakang.

Ajak toktsür kulen, Nagaland nung Shitakba Democratic election arutsü ano mapang lir, saka tanem tanemi melenshiba angur. Candidate kar bo sen mali contest asü (asenok ajungtsü atema) nisung aikati NOTA nunga vote agütsüogo, nisung aikati sen memeshi candidate shiba tajungba pa/la nem vote agütsü. Item ajakji asen neburtem atema temaitsü tajung. Ano Election arutsüako, maneni asenok public/neburtemi kechi tajung aser ochi aji ajiteta meranga dang tarutsü atema bilemer kechisarena maparen ajak inyaktsü ayongzükter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Iran-i Yousef Nadarkhani aser danga Khristantem chiokogo



Pastor Yousef Nadarkhani

Tehran, Metsüremi/March 07 (Agencies): Iran nung 1979 revolution temaitsü sorkari küm shia tatok agütsürtem rongnung tamangba yimsü melenba yong mapang ka tasüba temerenshi ngur alisang Pastor Yousef Nadarkhani ya densema Khristanpur asem tawa tepuokdak nungi chiok.

Islam yimsü yutsüba yong Nadarkhani masü tashi tepuokdak ayutsü 2010 küm obendang agütsü, saka tatok agütsüba sülen February 26 nü chiok aser ita tetenzüklen Hadi Rahimi aser Zaman Fadaei na chiok, ta tamangba yimsü temeden asoshi nokdakba teloki ashi. Parnok chiokba atema pela agizükba lemsatepdang, Iranian standards nunga temzüng ozüng shidak mamshiba ken o tem nung parnok mapang talangka tepuokdak liogo, ta ashi.

"Parnok nem tatok agütsüba ya mezüng obendang agütsüba aser parnok aser parnok kibong temi timtem ajuruba den mapet. Ajisüaka parnok chioka maneni parnok kinungertem den aliba ngua pelar," ta Iran with Middle East Concern (MEC) nung takotet nisung kati ashi.

Tamangba yimsü melenshiba ken o nungbo Nadarkhani ya 2012 küm September ita temeden ngua liasü saka sayutsüngiba ken o nung aibelenba yong küm asem tepuokdak ayutsü obendang agütsü.

Ajisüaka Rasht nung Ministry of Intelligence nung agent temi 2016 küm May ita Khristanpur ki mita ao tenzükang pa den pa kinungtsü maneni apu. 2016 küm July ita Rasht nung aliba Revolutionary Court ajanga Nadarkhani-i national security anema mapa tamajung inyak ta aitsü aser pa ya Zionist lir ta tai tonglokja liasü.

National security anema inyakba, house church lapoktsü ajungshiba aser 2017 küm June ita Zionist Christianity ajungkettsüba atema Nadarkhani, pa kinungtsü aser ano Khristanpur ana tepuokdak

küm ter ayutsü obendang agütsü. Nadarkhani ya ano Nik Shahr nung küm ana ayutsü obendang agüja liasü.

Iba sülen Nadarkhani ya 2018 küm July ita ketdangsürtemi par kidang lia apu aser Evin Prison nung ayu. Police temi Nadarkhani aser pa jabaso apuba mapang parnok tena merenshi, ta MEC aser danga advocacy telok temi ashir. Pa indang ken o obendanger temi tanaben lepa reprangshiba sülen Nadarkhani temerenshi ya ajemja küm trok kumsü.

Nadarkhani jakdang nisung ana chioker liasü. Hadi Rahimi ya Evin Prison nungi February 15 nü chiok aser kasa tepuokdak nungi Zaman Fadaei ya February 8 nü chioka liasü.

Rahimi ya 2020 küm February ita Rasht nung aliba house church züngsem asem den külemi apu aser ita asem lir bail bond sen 200 million toman (US nung sen 12,000 shi) agi chiok. Rahimi yagi national security anema inyakba aser house church ka nung dena Zionist Christianity prokshiba mechi 2020 küm August ita küm pezü tepuokdak ayutsü obendang agüja liasü.

Kasa mapang apur Khristanpur tepuokdak küm ana nungi pongu tsüngta ayutsü obendang agütsü. Ita ka lir Rahimi nem temerenshi agüja aliba bukuma obendang agütsüshi aser January 9, 2022 nü pa tepuokdak bushia aru.

Ano Islam nungi Khrista dangi meyiper Fadaei ya iba anogomung nüngtem nung February 8 nü chioka liasü. Tepuokdak alir nisung meyirijang aika nem tatok agüja chiokba nung shilem ka ama Rahimi aser Fadaei nung nem tatok agütsüba ya Supreme Leader Ali Khamenei-i melaba lir.

Fadaei yagi Iran sorkar jashidakja Khrista sülen anidak. Communion sentong ka nung pai yi (wine) ajemba mechi 2020 küm November ita pa dak 80 ben süng agi züka liasü. National security anema house church

nung sayutsüngiba aser Zionist Christianity ajungkettsüba mechi kasa küm June ita pa küm ter tepuokdak ayutsü obendang agüja liasü.

Iba sülen June 2020 nung Fadaei temerenshi ya küm pezü ajemtsü.

Tawa Iran nung nüburtem makmak-shimakba ajanga February 11, 1979 revolution tenüng nung shirnoksa chioktsü ta bilema liasü. Iran state media ajanga tepuokdak alir nisung 10,000 chiokba osang sangdongba sülen Iran nung aliba tamangba yimsü temeden asoshi nokdaker temi dangartem chiokba osang bushitepba mapang lir.

Ketdangsür temi January 28 nü Khrista dangi meyiper Anahita Kademi ya bail bond sen 180 million toman (US sen 4,000 shi) nung chiok, shiba sorkar inyakyim anema olulu prokba aser nüburtem tangatetba meinprongba mechi aitsü.

Khademi ya nüburtemi kanga junga meteta aliba Pastor Abdolreza Haghnejad kinungtsü lir aser January 3 nü la Bandar Azali nung aliba intelligence office-i arutsü tuyu, kong la dang asüngdangya asü, apu aser iba sülen Rasht nung aliba Lakan Prison-i yok. La kinungbo ya Lakan Prison nung lir, shiba linük security anema tekülem kidang masü Khristan yimsü prokshiba aser Islam tsükchir nem osang agütsüba asoshi küm trok atema tepuokdak yua lir.

Karaj nung aliba court kati Pastor Haghnejad ya linük asoshi tsükchir ka ta sangdong.

Khristanpur yariba Open Doors indang 2023 World Watch List nung Khristanpur alitsü asoshi tamajungtiba linük 50 asadanga nung Iran ya jenjang ti buba nung lir.

ANOGO ABEN TSÜNGREM DEN

Shirnoki anidaker parnok asoshi

- T. Ken 71: 12 - 24.

Asenok tambur akümdang mapatem melenshir. Asenoki mapa kar toktsütsüla aser tanga ka tenzüktsüla. Tenüngsang Ken 71 nung Dawidi maneni ta asem ben tashi amshia lir. Mezübuba, asenoki sarasadem nung maneni Kibuba dangi aotsüla: " Ni asoshi na talidak lung süang aser aji agi ni maneni aotsü" (t. 3). Kechi koma tain südir süang, asenoki maneni sarasademtsü akok, kechiaser Kibubai kodanga tamakok maludaktsür. Ano asenoki maneni tenüngsang agütsütsü akok. " Maneni kü nüngsang na atema alitsü" (T. 6). Maneni sarasademra maneni tenüng asangbaa alitsü. Ano Dawidi ashir, " Saka ni maneni yimlatsü."

"Au, O Tsüngrem, taruba putu dang ni ne tashi memettedaktsü tashi, ni tambur aser kubu pua akümdanga ni senzüka teyutsü" (T. 18). Dawidi pa nüngdak nung dangbo meranglok. Kibuba indang tangar den lemsateptsü asoshi pai pa nüngdaktem kanü. " Nai kü uluba renlokjang ...kongki agi ni ne dang tenüngsang ken atentsü' (t. 21,22).

Sarasadem nung asenoki teti Kibuba dangi ora, Pa tenüng asangba nung asenoki maneni lira, asenoki Pa dak maneni yimlara aser Pa tenantgzükbatem nung maneni lira, aser ano tajungtiba asenok dang arutsü lir ta maneni amangra aser Pa tenü tali sanga lira, idangji asenoki tasü ita tambur akümtsü. Asenoki Kibuba sentsüwangshidaktsütet aser tarutsü putu den asenoki Pa indang lemsateptetsü. Kechi koma senmang ka nai tarutsü putu nem yutsür? O agi aser taküm kuli agi nai tarutsü putu dang kechi sayur? Ne taküm aser kuli agi nai ne tamang tarutsüt putu nem yutsür ama?

Na tasoba küm kecha mesükshi nai Kibuba nem sentsüwangshi bener arutsütsü akok. Taintemi lemang balaka agi inyaktsü akok. Lanu putu dang asenoki Kibuba tamang katetba sayutsü akok. Tarutsü putu asoshi ne Khristan tamang senmang wazüka yuang. Ne taküm Tsüngrem asoshi teti kuli süba ka südakjang.

Senotsü meshidaki amshiba mechi Louisiana pastor ka tepuokdak ayur



Louisiana pastor Charles J. Southall III

Louisiana, Metsüremi/March 07 (Agencies): Louisiana pastor Charles J. Southall III shibai 2022 küm October ita senotsü meshidaki amshiba aser ashikülaka sen \$889,565 agiba nangzük, pa küm pongu tepuokdak ayutsü obendang agütsüogo.

Southall-i sen \$900,000 jungnüa ya menoktsü aser iba ken o nung timtem ajurua alir nisung ka nem anogo ter tsüngta sen \$10,000 agütsütsü tuyu. Pa

tsütsü tashiyim amshia arogo raksatsü, ta ashi. Parnoki Southall ya tiazü jembir aser auer ka lir aser pai tajung inyakba ajak tangbo miim kumogo, ta ashi.

Southall ya First Emanuel Baptist Church nung pastor ka ama küm 30 dak tema inyaka arur aser iba ken o nung tai inyakba nangzükba sülena maneni ministry mapa inyaka February 26 Deobarnüa pulpit nung nokdak, Mongulbar nikongdang Bible study ka live-stream asü aser iba anogosa pa nem obendang agütsüba osang prokshia liasü.

Pai aibelenba nangzükba mapang Southall-i pa indang ken o ya media nung meshidaki sangdong ta shia liasü.

October 18 nü online Bible study ka alidang "Ibai senotsü meshidaki amshiba indang khenyongi masü," ta ashi. (Maneni tapak 8 nung...)

AO OSHI ANGAZÜKDAK: TANÜ ANGAZÜKTSÜBA OJANG

Pasalang (adj) shi ango maden chiyongba, pasa chiyong (simple food without meat and fish items)
* Shi ango achi majungba agi pasalang dang chiyonger.
Pataka (adj) iba amai tulu ta sayuba (this much)
* Kü dak malangba sempet pataka ya bener arutsür na ?

OLONG PAITEP # 6449

Grid for crossword puzzle #6449 with numbered squares.

- TIPILEN: 2. Auo nung chiyongsü asenba - (7), 5. Mangyimba mapang - (5), 7. O tamendakdak - (4), 8. Pei dak malangba - (7), 10. Juli - (7), 12. Sen ayudak - (7), 14. Tenük agi ajitet - (4), 15. Tamajung aküm - (5), 16. Apuso - (7)
LANGTSÜNGLEN: 1. Lenmang - (7), 2. Aor kidong ka tenüng - (6), 3. Tenarong maten - (6), 4. A _ _ _ g - (3), 6. Mopung apodoka ola adokdaksüba - (3), 9. Tongtipang tagitsü - (7), 10. Menungra bilem - (6), 11. Aiür - (6), 13. S _ _ _ k - (3), 14. T _ _ _ r - (3)

OLONG PAITEP # 6447 TELANGZÜBA

- TIPILEN: 1. Yiar, 3. Tesola, 7. Yimra, 8. Tangar, 9. Peria, 10. Tanur, 11. Tasen, 13. Lemjem, 15. Tambu, 16. Khuret, 17. Sang.
LANGTSÜNGLEN: 1. Yimti, 2. Amen, 4. Shiner, 5. Alaka, 6. Satan, 9. Putet, 10. Tembar, 11. Tatok, 12. Amang, 14. Jala.

WARAKLA O ALOKBA NA TIA : Warakla : Saalaa, kü taküm nung aibelen tulutibaji nü den kibong akümbaya, mojing ka denang sadiba tajungba sülar! Alokba : Waa, sobaliba dak makütba o ya tejembima, mojing denji sadi asü asübo adianu kibalembuba met senchi tulu chirang yimdaka melidaksüi aridoker lila niiii! ~ Lilir : EWhatsApp

Tepela Tasoba Anogo. Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanja zülur, noksa (photograph - any size) ka den anogo 3 mesüra 4 jelia e-mail : tiriyimim@gmail.com nung yokang mesüra Tir Yimyim bureau tem nung agujang. 1. Tenüng, 2. Tasoba anogo, 3. Küm, 4. Class, 5. School, 6. Talidak, 7. Salem osang

Mizoram nung külem police 2 khasetsang mapa nungi anentsü



Mizoram Inspector General of Police (Headquarters) John Neihlaia-i osangbener den jembiba angur.

Aizawl, March 7, 2023

(Agencies): Mizoram nung arishi küm 56 tain police kati külem armed personnel ana khasetba atema Mongulbarnü pa mapa nungi anentsüogo.

"Mizoram Armed Police (MAP) indang 2nd battalion nung havildar Bimal Kanti Chakma mapa nungi anentsüogo" ta Mizoram Inspector General of Police (Headquarters) John Neihlaia-i ashi.

"Chakma-i yi jemer külem police ana khaset. Iba ya police tesayuba aser inyakyim anema lir anungji pa police asütsü metemsü. Pai Mizoram Police department nung züngsem asüba temeten ajak agiener aser

major penalty agütsür" ta Neihlaia-i ashi.

Mizoram-Assam arrtsü anasa aliba Kolasib district kübok Buarchep nung Chakma-i külem police ana khaset.

Tenaji J Lalrohlua (51) aser Indra Kumar Rai (53) na jangjaogo. Tenaprong ya kasa battalion nung havildar tem liasü, ta Neihlaia-i metetdaksü.

Lalrohlua dak tekolak nung akha aser pa idangjisa asü saka Rai jibo Vairengte hospital-i anir aodang len tom nung asü. Rai dak teku nung injang khaloktsü.

Deobar nikongdang 6:15 ako meta tena ya Border Outpost nungi metre 400 shi pilar barrack-i aodang injang

khaloktsü.

Par medemertemi pa yi ajemba indang ketdangsurtem dangsa ashi. Iba jagi pai tena dang kechiba post commander dang pai yi ajemba indang ashi ta asungdang ta Chakma-i ashi.

Chakma-i tena dak pa indang service rifle (AK-47) ajanga injang khaloktsü.

Mizoram police-i tasür kibong shia nem police welfare fund nungi Rs. 1 lakh teyari agütsütsü, ta Neihlaia-i ashi.

Mizoram chief minister Zoramthanga aser Home minister Lalchamlia naprongi tasür kibong nungi nisung kaka nem state police department kübok mapa kaka agütsütsü mulunga agizükogo.

Manipur nung benjung tulutiba 'Yaoshang' tenzükogo

Imphal, March 7, 2023

(Agencies): Manipur nung benjung tulutiba Mongulbarnü Imphal nung tenzükogo. Iba benjung ya Yaoshang (Hindu nunger atema Holi) lir.

Mongulbarnü nisung noklang aika Imphal nung aliba Kangla Fort nung adenshi aser parnok torch rallies atema mi benden.

"Yaoshang ya sports movement ka kümogo kechiyong benjung mapang saisapong balala asayar. Manipur nung lisopur

saisapongtem- Ougri Hangen Chongba, Mukna, Sagol Kangjei, Yubi Lakpi, Kang aser Thang Ta amala wazüka ayutsüla" ta Manipur Governor Anusuiya Uiquey-i ashi.

Yaoshang ya Manipur nung benjung tulutiba lir aser nisung ajak dangi iba tepela salem abener, ta Chief Minister N Biren Singh-ia metetdaksü.

Manipur nung media houses-i benjung tenüng nung anogo pungunü sodi agütsür aser iba ajanga March 12 tashi osangkaket ka danga

madoktsü.

All Manipur Working Journalist's Union (AMWJU)-i anogo pungunü asayamung ka ayongzüka lir.

Manipur nung alirtemi lanurtem kümzüksü atema sports movement pusemtsüla ta AMWJU president Wangkhemcha Samjai-i ashi.

Külen, Manipuri Students' Federation (MSF)-i Class X aser XII tatidangtem aliba ajanga Yaoshang benjung ya anogo pungu dak tali mamongtsü mepishia metetdaksüogo.

SEBA-i Cachar centre nung tatidang agishitsü tuyur

Silchar, March 7, 2023

(Agencies): Assam's Board of Secondary Education (SEBA)-i JR Higher Secondary School, Ganirgram, Cachar nung tatidang agishitsü tetuyuba agütsüogo.

Hokolbarnü video ka prokshiba nung nisungtemi school atsü alema irr tatidang agütsürtem nem tezülubatem lema agütsüba angu.

March 3 nü English subject indang tatidang nung Cachar district kübok centre no. B23-0138, J R Higher Secondary School, Ganirgram nung kaketshir kari tim masüba inyak, ta SEBA-i ashi.

"Iba examination centre nung tim masüba inyakogo anungji kaketshir ajak (760)-i Compartmental Examination, 2023 nung English subject agütsüshitsü. March 3, 2023 nü J R Higher Secondary School, Ganirgram nung English subject tatidang agütsüba kaketshirtem indang answer scripts mererpangtsü" ta parnokisa tetuyuba agütsü.

Assam Chief Minister Himanta Biswa Sarma-i iba tatalokba metet aser pai State Education Board nem tetuyuba agütsüba sülen SEBA-i iba osang metetdaksüogo. Cachar Police-i video tem

reprangba sülen nisung pungu puogo.

Ano, tatidang anogo tanabuba nung Cachar district nungsa Mathematics subject indang question paper temai adok. Iba ya Dalooogram nung centre ka nung ataloka liasü.

Iba ya "leak" masü saka ashioksüba lir kechiyong question paper ji tatidang tenzükba sülen temai adok ta osang ajanga ashi.

Iba osang angashiba sülen Cachar DC Rohan Kumar Jha aser Cachar SP Numal Mahatta na examination centre-i ao aser cheats & mobile phones aika apu.

Mexico: Tanur 103 densema nisung noklang aika gari ka nung ngutet

Mexico City, Metsüremi/ March 7 (Agencies): Mexico nung ketdangsürtemi tanur 103 densema migrant aser refugee 343 highway tezulen freight truck container ka nung lia ngutetogo.

National Immigration Institute (INM)-i Hombarnü ashiba agi, iba tata gari ya Veracruz state kübok Gulf tzüküm nung nguteta liasü.

Iba lenmang ya nisung shibelenertemi southeastern Mexico nungi United States arrtsüi nüburtem anir arutsü atema amshiba lenmang ka lir.

Tata gari nung mena alir ajak anema liasü, ajisüaka gari anisang ya kechiba jena ao aji mejangja, ta ketdangsürtemi ashi.

Tanurtem ya timba Guatemala nungi liasü. Migrants shirnok US tonga oteter parnokiyimya agi parnok tanurtem anir arutsü atema shibelenertem nem taa agütsür.

INM-i ashiba agi, gari nung mena alirtem ya timba Guatemala, Honduras, El Salvador aser Ecuador nungi liasü.

Tanurtem ya Veracruz indang family services system nem achaayangdaksütsü aser tanungba nisungtem ya Mexico nung parnok indang legal jenjang jangjatsü atema asadangtsü, ta INM-i ashi.

Taoba mapang sentoka toktsür aliba tata garitem nung nisungtem sür aliba ngutetogo.

Container telung kanga junga yanglur aliba ajanga shibelenertem jenjang tali tajungba akümba sayur. Trailer nung fan aser kilem nung ventilation ports inoker liasü aser nisungtem nem bracelets sentü balala inoktsür liasü, koba parnok ya shibelenertem indang client tem ta jangjatsü asoshi lir ta amanger.

Mixico ajanga US-i kuli kaket tejangja maliba migrant tem shibelenertem aotsü atema tata gari amshiba ya ajak dang lendong tulutiba aketba inyakyim ka lir.

Taoba küm June ita San Antonio, Texas nung tractor-trailer truck ka anü tatsük nung sentoka toktsüba sülen nisung 50 dak tema sür aliba nguteta liasü.

2021 küma December ita Central America nungi US-i oya aliba migrant 56 asü aser aika yirua liasü. Parnok mena aliba tata gari ya southern Mexico nung mekupokba sülen iba lendong ajurua liasü.

US aser Mexico arrtsü nung nüburtem 2022 küm timba senzüba mangaoka lir aser US Border Patrol-i iba tesem nung arrtsü adentsü meranger 2,378,944 ajuruba mangaoka lir.

MULUNGNEN O



ASO: 28.12.1982

ASÜ: 16.02.2023

Kodanga amatsü makokba ozü jabaso asür Wabong Temjenliba Longkümer, Naga Hospital Kohima nung mapang tatsüka shiranger iba tebour tajung temenungratsü lima toktsür tulusang asen tebu Tsüngrem den teti alitsü asoshi aoba mapang nungi ki tonga aser maparen ajak renema shirnokisa onok den pei akaba tajungtiba rongsen, tamang sarasadem, mapang aser takum tenlaogo, nenok ajak dang asür kinungertemi kangasa pelaba kija, kipong aser lokti tonga arua meshitet nung iba osang kakat ajanga ajak dang pelaba lemsateper. Asen takar Tsüngremi nenok ajak moajang ta sarasademtsür.

Ajak dak alia temenenpur ka shirang yipten nung anogo 14 alidang Tsüngrem chirtem, arogopur tamangdir shirnokisa nüktzü jenti lalua ozü jabaso molumi kangla nungi kotaki aotsüsa tanüla renemtsüogo, nenok ajak dang Tsüngrem tenüng sanga kinunger ajak tenüng nung pelaba lemsateper.

Ano kija, kibong aser lokti tenüng metetshiang melitet nung item dang pelaba nenshia lemsateper.

1. Naga Hospital, Kohima Doctors & Nurses
2. Jabaso tanüla alangzüksür Tsüngrem chirtem
3. Kohima Changtongya Union, anükapang aser tembartem
4. Azü tenla agütsürtem
5. Shri. Limasunep Jamir, IGP, Kohima
6. D.E.F. Kohima Police Dept. & S.P.
7. Shri. Watitoshi Kohima.
8. Shri. Taka Masa Ex. M.L.A, Kohima
9. Shri. Imnatiba, Ex. M.L.A, Kohima
10. Shri. Imokaba, Dimapur
11. Shri. Takutoshi, Dimapur
12. Shri. Apong Jamir, Delhi
13. Kohima Ao Baptist Arogo
14. NCRC, Kohima
15. NCRC, Changtongya
16. Changtongya Baptist Arogo
17. Changtongya Kosasanger Putu
18. Orangkong Baptist Arogo
19. Langpangkong Kaketshir Mungdang
20. CKT Changtongya
21. Longma Reju Zünga, Changtongya
22. Changtongya Police station
23. Alakteta teyariteper adianu aser kinunger ajak dang kangasa pelar. Tulusang Tsüngremi teyariteper ajak moajangma.

Temeim Tsürapor, teyi ana, tedi, tenu, anükapangtem aser temeim kinungertem.

SÜR KÜM KA AJUNGBA ANOGO MENUNGRA BILEMTETER

Temeim Oba,

Tanü na onok nungi pilaa Yisu dangi oer küm ka ajunger, ajisüaka onoki anogo shia nü mapa tajungtem aser yimya tsülaola amatsü makok. Onok mulungjang nung na teti lir.

Nai toktsür aoba kinungertem tanü na bilemteta sarasadema amonger.

- Temeim Kinungertem.



Pelaba Lemsateper



1930 - 26.02.23

"Tetsür aikati tajung inyakogo saka onok atemabo nai ajak dang tajungba inyakogo."

Onoki teti meima aliba **Asür Imnatula**, asür Medongsangba (Mopungchuket) kinungtsü, arishi tembangba mapang onok den shisatsü, sarasadem, nübu aser rongsen agi yarir ajak dang kinungertemi pelaba lemsateper.

Taochiba Tsüngremi nenok mapa tajung asoshi molamoshia moajangma.

- Temeim kinungertem

TSÜRABUR S. ABENLA OZÜKÜM ARISHI KÜM 75 AJUNGBA

Temeim oja, na iba akümüli nung küm tenem ser metsü renteta arur, tanü iba anogo ne tasoba küm 75 abensaba tepela salem onok ajak nungi abener.

Teyanglur Tsüngremi ne arishi talang moajangma ta sarasadem.

Temeim aki, jabsotem, jalatem, Semchirtem & Sosemdangsem



8th March 1948 - 8th March 2023

OFFICE OF THE **KANGTSUNG SENSO MUNG DANG**
P.O. Tuli - 798618
District : MOKOKCHUNG, NAGALAND
Email: kangtsungsensomungdang@gmail.com

MULUNGNEN TETUSHI AGÜTSÜR

Kangtsüng Senso nungi tsürapur Wb. Chubamenba aser kinungtsü Wt. Moatenla na jabaso tasembuba aser khuret angateta benteba kinungtsü Wt. N. L. Asenla (Chungliyimsen) kinungbu **Dr. Imsutoshi Lemtur (Asso. Pastor, KABA)** tamang nung liromedema kibong aser jembiba ama mapa agi sayuteta litetpa taküm. Shibai meranga inyakba temaitsü sayua **"Digital involvement : Discovering an active participatory media education in the Church"** onük nung **Doctorate of Theology in Communication under Senate of Serompore** nung takok tulu ngutetogo. Pa aser par kibong dang Kangtsüng Senso Mungdang-i kanga mulungnena pelaba den tetushi tulu agütsür. Tsüngremi dak chichia tamang katetba tsüngchir kibong, teyanglur Tsüngremi pa wadang tuluba inyaktetsü asoshi kechisarena ajak nung molamoshia moajangma ta kulisüa sarasademtsür.

Sd/- S. Imdong Kangtsüng Senso Mungdang President
Sd/- Bendang Imsong Kangtsüng Senso Mungdang Secretary



KANGASA PELABA LEMSATEPER

Ni teti dang akhümtsübu agüja aser meima aliba 25 Mongoya Assembly Constituency nüburtem, nenok ajak den tamasa ozü kibong ajanga temeim salem lemsateper. 14th Nagaland Legislative Assembly election nung noktaksü asoshi mapatong tenzüker külen anogo ishika tsüngda nung mapatong balala inyakba mapang nung Chuchuyimpang Senso Mungdang, Chuchuyimpang Rionsanger Putu Tatar Menden, Lanu Zünga Chuchuyimpang, Chuchuyimpang Union Dimapur, Chuchuyimpang Union Kohima, Chuchuyimpang Union Chumukedima, Chuchuyimpang Union Mokokchung, NPF Mokokchung Division, Alongmen, Penli, Majakong, Artang aser Lijaba lijen, Ward Pungo yimden-i anir nüburtem, Ward Pungo prongla nung NPF Party lenirtemi anir Committee balala agi ataa alirtem, Yimtsüng balala nungi yimden, kija kibong, pur medemsor lokti tentet kwikati tajungtiba agi nübu rongsen, shisatsü, Ak, jang, chiyungtsü tapu balala aser sarasadem agi nungita yariogo, nenok ajak dang kangasa pelaba iba osang ajanga lemsateper. Maneni Clean election tangatetba dak ajemdaker Ward Pungo prongla nung Arogo Sannükertemi anir arogo tenzükertemi sarasadem nung nungitba aser Ward pungo sanger nüburtemi ochi tangatetba agi mulungtsentsü ajak agi nungita yariba ajakji kü dak malangba temoatsü ta züngshir aser item temeim mapa ni kodanga mamatoktsü ta shisemer.

Ni election nung tokteptsü asoshi sangdonger külen Chuchuyimpang Arogo-i Tsüngrem dang temoatsü meshia sarasademtsüba den metitemi dang sarasadem nung nungitba asoshi pelaba shisemer. Aor sobaliba nung aliba ama Sempo Jamir llangtsür aser Asemer aser Sangwanok llangtsür-temia anogo ananü asemnü tashi süng süngko benja yaritepba asoshi tepelaba lemsateper. Election dak sentakba mapatong asoshi kija lokti shirnokisa pei tangatetba tajungtiba agi yaritepogo, tsüngdong aruagi nenok dang pelaba meshitet nung nenok tenüng metetshia nenok ajak dang kanga dang pelaba lemsateper. Talisa shirnokisa kü nem senti vote agutsüogo, nenok dang kanga dang pelar ta metetdaksür. Ni asen Mongoya kanga dang meima aru yamaji tanü ni election nung madokaka ni Mongoya nüburtem asoshi akokba lenmang ajak nung nungita yariteptsü tangatetba lir ta lemsateper.

Tulusang Tsüngremi Mongoya sanger tali dang moajangma ta ozü kibong sarasadem.

(MOASANGBA JAMIR)
NPF Candidate
25 Mongoya Assembly Constituency

ALI AYOKTSÜ LIR

Foothill road nungi minute 2
Hozukhe village Rs 25/- per sq.ft.
Phone no:- 8974869756 / 8259001052

Senior Women's National Football Championship nung team 32 asayatsü

New Delhi, Metsüremi/March 7 (Agencies): 27buba Senior Women's National Football Championship March 25 nü tenzüksü.

Asayamung nung shilem agitsü aliba team 31 teloktrok kuma lemsar qualifying round asayatsü, koba linük kübok tesem trok nung asayatsü.

Iba asayamung tatembangbuba round nung team 12 tokteptsü, kong telok trokprongla nungi temaba jenjang nung tembangba team trok, best runners-up pongu aser Railways densema alitsü, shirnok qualifying round masayai indang indang tatembangbuba round nung asayatsü.

Team 12 ya telok ana kuma lemsatsü kong team trokrok alitsü. Telok anaprongla nungi

temaba jenjang nung tembangba team ana semifinals atema qualify asütsü, ta AIFF-i ashi.

Manipur team-i otsütsüsa iba asayamung 21 ben koka lir aser parnoki taoba Senior Women's National Football Championship asemprongla koka lir. Manipur team-i tesüsabuba 2021-22 küm iba asayamung final nung Railways pur penalty metsütepba sülen koka liasü.

Qualifying round atema telok telemsa aser asayatsü aliba tesemtem:

GROUP I - GNDU Sports Complex, Amritsar, Punjab Punjab, Telangana, Sikkim and Haryana.

GROUP II - IGIS Complex, Haldwani/Rudrapur, Uttarakhand

Uttarakhand, Chandigarh, Pondicherry, Kerala, Maharashtra and Mizoram.

GROUP III - Navelim and Baulim, South Goa, Goa Goa, Rajasthan, Himachal Pradesh, Tripura, Andhra Pradesh and Odisha.

GROUP IV - Pant Stadium, Bhilai, Chhattisgarh Chhattisgarh, Jharkhand, Ladakh, Delhi, Jammu & Kashmir and Madhya Pradesh.

GROUP V - Sports Ground, Hindustan College of Science and Technology, Mathura, Uttar Pradesh

Uttar Pradesh, Tamil Nadu, Bengal and Andhra Pradesh.

GROUP VI - Bangalore Football Stadium, Bengaluru, Karnataka

Karnataka, Bihar, Manipur, Gujarat and Assam.

Kidambi Srikanth German Open nung masayatsü



Metsüremi/March 7, 2023 (Agencies): Taoba mapang World No.1 asayar Kidambi Srikanth-i German Open Super 300 badminton tournament nung shilem magitsü atema telemetba agiogo.

Iba asayamung qualifiers bo Mongolbarnü nungi tenzüko.

Asayamung nung Srikanth asayaba mangutsü ajisüaka taoba küm iba asayamung nung final tonga asayasang Lakshya Sen-i anir India nung asayatem asayaba angutsü.

Sen aser national champion Mithun Manjunath na India nung tebur asayatem rongnungi temaba jenjang nung asayaba asaya asütsü.

Sen, shibai tesüsabuba Commonwealth Games nung gold medal ngua lir, pai taoba küm iba asayamung semifinal nung world No. 1 asayar Viktor Axelsen tsükdaksü saka final mekokteti liasü.

Arishi küm 21 tain Almora nungi asayar ya taküm iba asayamung nung seed trokbuba

lir aser pa mezüngbuba asaya France nung asayar Christo Popov den asayatsü aser kokyonga tura top seed Malaysia nung asayar Lee Zii Jia den quarter final nung ajuruteptsü.

"Ni quarterfinals nung Lee Zii Jia den asayatsü akok aser iba asaya atema yongya atar. Iba asayamung nung junga asayatetsü atema ni takokba tashi inyakogo, anungji All England nung masaya tsüngda iba asayamung nung junga asayatetsü imlar," ta sen-i ashi.

Kasa mapang nung national championship mezüngbuba akokba sülen Manjunath pasasa dak kanga temulung lemteta alitsü aser pa mezüngbuba asaya taoba world champion Loh Kean Yew den asayatsü.

Tetsür kija asaya nung Malvika Bansod aser Saina Nehwal nata asayatsü aser tarep temeyoktep asayar Ashwini Ponnappa aser B Sumeeth Reddy nata asayaba angutsü. Tena 2022 CWG nunga külemi asayaogo.

Neymar tetsüng surgery agitsü; season tepeyong masayatetsü

Metsüremi/March 7, 2023 (Agencies): Paris St Germain forward Neymar, tetsüng teloktep yirur aliba surgery agitsüsaakümba sülen pa season tepeyong masayatetsüsa kümogo.

Brazil nung international asayar ya ankle ligaments yirur aliba anepalutsü atema surgery agitsü aser pa ita asembosa masayatetsü, ta Ligue 1 club yagi Hombarnü sangdong ka ajanga metetdaksü.

Neymar shibai Ligue 1 nung iba season nung goal 13 idaktsüba den assists 11 süja lir, pa taoba ita Lille goal 4-3 agi

akokba asaya sülen ken danga asaya mali aser pa PSG pur tesüsabuba asaya ana nunga masayatet.

"Neymar Jr, kümtem tsüngda tetsüng tachichi teloktep meshidakba ajanga mapangshia timtema arudar," ta PSG-i ashi.

"February 20 nü asayaba mapang pa tetsüng teloktep yiruba sülen medical staff temi tetsüng kanga mejungti raksarakpongba nungi jenboa alitsü atema ligament repair operation ka agitsü shiogo. Mongin balala den ken o ashishitepba sülen parnok ajaki operation agitsü nüngdaka aliba

lemsatepogo," ta club sangdong ajangasa metetdaksü.

"Pa ita asem mesür pezü sülenang training agi tenzüktetsü," ta club-i ashi.

PSG-i ashiba agi, pa surgery Doha nung agitsü.

Paris St Germain pur league nung tanabuba jenjang nung aliba Olympique de Marseille dang nungi point ti agi timba sür temaba jenjang nung lir. Parnok Bodhbarnü Champions League last-16 tanabuba leg nung Bayern Munich den asayatsü. Bayern den mezüngbuba asayabo parnoki goal 1-0 agi mekoki lir.

Novak maneni temaba jenjang nung lir

Paris, Metsüremi/March 7 (Agencies): Hombarnü sayaba ATP rankings nung Novak Djokovic maneni temaba jenjang nung lir aser pa ya temaba jenjang nung hopta (379) talangtiba aliba asayar lir. Ajisüaka tanabuba jenjang nung aliba asayar Carlos Alcaraz-i pa meneptsü ana nung lir.

Grand Slam 22 koker aliba arishi küm 35 tain asayar yagi taoba hopta Dubai semi-finals nung Daniil Medvedev mekokaka, temaba jenjang nung mapang talangtiba aliba asayar Steffi Graf ajateta liasü.

Taküm küm tenzüker Djokovic asaya 20 nung ken danga tamakok mongui asaya arua aliba Russia nung asayar yagi raksatsü aser final asaya nung Andrey Rublev koka hopta asem nung asayamung asem koka liasü.

Iba takok tajung anguba sülen Medvedev jenjang trokbubai tuogo.

Tanabuba jenjang nung aliba Alcaraz-i Indian Wells Masters kokra pa ATP ranking nung



temaba jenjangi atutsü. Vaccine magiba ajanga Djokovic-bo iba asayamung nung masayatetsüsa kümogo. Iba asayamung ya Deobarnü tenzüksü.

United States-i Covid-19 vaccine magiba bendangertem aitsü memelar aser ibayongji Djokovic US-i motetsüsa aküm.

Pai US nung ketdangsürtem dang temelaba ka meshia liasü ajisüaka magizük.

ATP top 20

1. Novak Djokovic (SRB) 7,160 points
2. Carlos Alcaraz (ESP) 6,780
3. Stefanos Tsitsipas (GRE) 5,805
4. Casper Ruud (NOR) 5,560
5. Taylor Fritz (USA) 3,795
6. Daniil Medvedev 3,775 (+1)
7. Andrey Rublev 3,660 (-1)
8. Holger Rune (NOR) 3,321 (+2)
9. Rafael Nadal (ESP) 3,315 (-1)
10. Felix Auger-Aliassime (CAN) 3,245 (-1)
11. Hubert Hurkacz (POL) 3,110
12. Cameron Norrie (GBR) 2,815
13. Jannik Sinner (ITA) 2,655
14. Alexander Zverev (GER) 2,500
15. Karen Khachanov 2,470
16. Frances Tiafoe (USA) 2,395
17. Pablo Carreno Busta (ESP) 2,240
18. Alex de Minaur (AUS) 2,165 (+4)
19. Tommy Paul (USA) 2,000 (+4)
20. Borna Coric (CRO) 1,905.

Senotsü meshidaki amshiba... (Tapak 5 nungi...)

"Ozüng tsütsü ni mera meshidak kar agi aser iba atema ni kanga jashir. Ni süoki ia bilemer. Ni account ka nungi kati sen belenba ya tai ta parnoki ashidang ni tai inyakogo ta nangzük. Ni aibelen masü ta bilem saka federal banking laws anema liasü."

FBI bushisüngdangba nung Southall-i pastor jenjang amshia tenla agütsüba aser danga sen tem pa jurila atema amshi, ta bushitet. Pa ya real estate investor ka asünung temolung melemteti senotsü amshiba pa dak majitet.

Southall-i arogo ka nungi tashiyim amshia sen \$10,000 meshia pa jurila atema amshi, arogo ka nungi küm pezü tsüngta teyari mapa inyaksü aser arogo indang ki-o-jen yanglushitsü atema tenla agütsüba sen \$106,408 auya, arogo indang housing ministry meyong ki-o-jen nungi sen aruba agizüka agi, aser Christian charter school ka indang budget nungi sen \$220,000 ayua, kong pa board

tir liasü aser Baton Rouge nung campus ka lapoktsü sentong yanglu saka iba sentong kodanga magizük.

Mongulbar aonung online Bible study aliba mapang Southall-i arogo indang deacon board den jembiogo aser pai livestream asüba parnoki meteta lir, ta ashi.

"Timtem komaka tulu süaka Tsüngremi lenmang lapoktsütsü. Pai na mezüja shimtetsü," ta Southall-i online Bible study nung ashi.

"Ni mapa tajung inyakba agi ni mezüja shimteta masü. Aser arogopuri aji angatetsüla. Asenok ajak tetemsü masü. Temsüba ajanga mezüja shimteter masü... Tsüngremi molungba ajanga dang nai ibaji ajangtetsü."

Akhi mapang dang nungi tekeraba nung iba sentong tembangdang pai "Ni ano teinyaksü jenti lir, aser iba atema ni Tsüngrem dang pelar. Nenok ajaki sarasadem nung ni bilemtetang," ta pai ashi.

BILEMDANGANG

"Lemsatepba nung teti tepela lir."